

*THEN I-NA: ZIRLÂI TLÂNGPUI THLÎRNA***Châng Thlan:** *Daniela 6.***Bible Châng Thlûr Bing Tûrte:** *1 Samuela 18:6–8; Daniela 6; Matthaia 6:6; Marka 6:14–26; Tirhkohte 5:27–32; Hebrai 11:35–38.*

Thuhmahruai: Daniela 6 hian Daniela rinawmzia a sawi a. Pathian nêna an inlaichînna hnuh hniam âi chuan sakeibakneite ei zawh vek nih pawh a thlang zâwk. A tâwpah chuan Pathian lakah leh lalber laka a rinawmzia chu pho lan a ni ta nghe nghe a ni.

Zirlâi Thupuite:

1. Rinawmna. Lalber ni lo, pathian emaw, mihring emaw hnêna dîlna thlen rêng rêng chu khap bur a ni tih thupêk khauh tak mai chhuah a ni chung pawhin Daniela chu Jerusalem lam hawiin a la tawngtâi zui zêl tho a. Duh ni se, a turhverhte khârin a rûk têtin a tawngtâi thei reng tho; mahse, a testimoni chu thup a tum rêng rêng lo va. Thutak a hriat nun chhuahpui chu ama sahimna tûr âi pawhin a dah pawimawh zâwk a ni.

2. Thiam chantûrna. Daniela chu Pathian laka a rinawm êm avângin LALPA vântirhkohte chuan sakeibaknei koham tak takte kê chu a tichîp tlat a. Lalber hmâah leh a nunna lâk tumte hmâah chuan humhim niin, thiam lohna a neih lohzia tihlan a ni ta ni. He Hebrai saltâng rinawm tak thil tawn hi sual thiltihtheihnain a dodâl leh tihduhdah Pathian mite tân thlamuanna tham a tling a, anni pawh chhanchhuah an la ni ve ngei dâwn a ni.

Nuna Bel Tûr: Kristian politician fel leh beisei nei sâng tak takte chuan Daniela thil tawn hi politics huang chhûnga an luh ve chhan niin an sawi thîn a. Ni e, Kristian politician-te leh sawrkâr hnathawk lian zawng zawng hian Daniela rinawmna hi entawn hlawm se chuan kohhran leh khawtlâng tân malsâwmna ropui tak an ni ngei ang.

THE 2-NA: ZIR ZÂUNA

1. Rinawmna

Daniela hi satrap-te enkawltu governor pathumte zînga pakhat niin, satrap-te hnathawh dân an vil bâkah, lal hnênah chhiah tha taka a luh zêl theih nân an sum vawn dân an en diksak thîn bawk (*Dan. 6:2*). Sum enkawltu rinnawm lo leh enkawl hna thawk thiam lohte hi hmâsâng ata tawh ram hrang hrangte thanmawhbâwk a ni thîn a. Hmâsâng Bible ram vêla an thuziak hlui an hmuh chhuah thenkhatah chuan rorêlna ina thawk mi thiamte leh lal thurâwn petute zîngah khân inelna leh inepna boruak eng eng emaw a awm ve thîn tih a lang a, an elpuite leh er zâwngte chu lal hnênah hêk an chîng hle a ni âwm e.

Chutiang chu a nih avângin, Lal Daria ina thil thleng pawh hi thil danglam a ni bîk chuang lo va, governor dang pahnihte leh satrap-te khân Daniela hi an thîk hle a, chuvâng chuan dah bo dân kawng an zawng ta a ni ang, an zînga pakhat, ram dang mi ni leh nghâl kha lalberin prime minister dinhmun hialah a dah ta luah mai si a. Hnawk an tih chhan dang ni thei pakhat chu a rinawm êm êm mai kha a ni ang. A rinawm êm avângin mahni tânghma hâi duhtu leh sawrkâr sum ei ru duhtute chuan an duh ang an tih theih loh phah tlat mai a ni. Hêng sawrkâr mi lian corrupt tak takten Daniela an huat chhan chu Juda mi a nihna kha a ni bawk âwm e (*Dan. 6:13; Dan. 3:12*). Ani hi chu an pathiante lakah ni lovin, ama Pathian lakah a rinawm zâwk si a.

Lalin thupêk chhuah tho mah se, Daniela chuan a tawngtâi a thulh duh chuang lo va. Ni tin vawi thum a la tawngtâi chhunzawm zêl tho a ni (*Sâm 55:17*). Daniela chênna in hi a chhâwng niin, a chhâwng chung zâwkah chuan tawngtâina tûr pindan zîm tê a awm a nih a rinawm a. Chu pindan chuan thlang lamah tukverh neiin, Daniela hi tempul tihchhiat hnu awmna Jerusalem lam hawiin a tawngtâi thîn a nih hmêl. He tempul hi hawn a nih tum khân Solomona chuan tempul lam hawia tawngtâi thîn tûrin mipuite a hrih a (*1 Lalte 8:35, 38, 44, 48 en la*).

Chu thu chu Daniela pawh hian a la zâwm zêl niin a lang (*Sâm 5:7, Sâm 28:2 en rawh*).

Jerusalem chu tempul awmna a nih avângin Pathianin a chên chilh, a ðhuthmun a ni a. Hetianga Jerusalem lam hawi khera an tawngtâi pawh hi a hming awmna hmun atâna Jerusalem khawpui thlangtu Pathian Jehova laka an rinawmzia tilangtu a ni. Chu mai bâkah chuan, Daniela hian Jerusalem tun dinna chu thuthlung thutiamte kha a taka a hlawhtlinna tûr niin a ngâi bawh a (*Jeremia 31 leh Ezekiel 36*). Tûnah hian Babulona chêng ni mah se, Babulon mi chu a ni chuang lo; a khua leh tui nihna dik tak chu Jerusalem khawpuiah a awm a ni.

Aw le, heta ðanga thil kan hriat hmasa ber chu lalram hotu lû a nihna anga a rinawmna kha a ni. Lal Darian prime minister ni tûra a ruat chhan pawh hi governor hna a lo thawh tawh dânah khân sawisêl bo a nih vâng a nih a rinawm a. A rinawmzia hi ama hmêlmate ngei pawhin an hai bîk chuang lo bawh. Chuvângin, thil pahnih sawi lan tlâk a awm ta a. A hmasa zâwk chu Daniela hmêlmate hian Danielan lal hna a thawhna kawngah a tihsual pakhat mah a nei lo tih an hria: “Tichuan, hotute leh thuneitute chuan ram chung thu-ah chuan Daniela chungah remchâng an zawng ta a; mahse remchâng rêng an hmu thei lo va, dik lohna an hmu thei hek lo; a rinawm êm êm si avângin, amahah chuan tihsual emaw, dik lohna emaw hmuh tûr a awm si lo va” (*Dan. 6:4*).

A pahnihna, a hmêlmaten hnawh an tih chhan leh amah dah bona tûr chhuanlam ðha ber nia an hriat chu Pathian laka a rinawm tlat kha a ni. Hetianga a rinawm tlat theih chhan chu a rinna a nunpui a, a rinna chu ualau takin a lan chhuahtîr bawh kha a ni. A thil ngaih pawimawh ber chu mi tinin an hriatpui vek a ni. Chuvâng chuan, a hmêlmate pawhin a sahuat lâi takah chhutsak chat an tum ta rêng a. Chutianga an tih chuan, Daniela hian a rinna chu a thlah duh dâwn lo Chiang a, tichuan, an duh ang takin an tihlum thei tawh mai dâwn a ni. Daniela erawh hi chuan

sawrkâr hnathawk a nihna anga a mawhphurhnate leh Pathian dik tak chhiahhlawh a nihna chu thil inkalh niin an hre hran lo va. Dik tak pheih chuan, sawrkâr hnathawk a nihna chu thil eng kim chung a thuneitu sâng ber Pathian chawimawi theihna remchâng tak ni-ah a ngâi zâwk a ni.

2. Thiam chantîrna

Sakeibaknei pûka Daniela paih luh a nih chungchânga thil ngaihnaawm leh bengverh ber mai chu sakeibakneite lak ata chhanchhuah a ni kha a ni âwm e. Hetianga hlimawm taka thawnthu khâr a ni hi Bible-a thawnthu dang kan hmuh, entîr nân, rawhtuina meipui lak aţanga Daniela thian pathumte chhanchhuah a ni ta te leh Joba hnêna malsâwmna vûr leh a ni nênte pawh khân a inang tlang hle mai. Chûng zawng zawng âi pawh chuan Bible thuchah pum pui nênte pawh a inrem êm êm hi a ni, Bible thawnthu pawh hi sualna zawng zawng hi tihboral vek a la ni ang a, Pathian chatuan lalram chu din a ni dâwn tia tih tâwp a ni. A hmêlmate phiarna lak ata Daniela chhanchhuah a ni a, thiam chantîr a ni ta hian Pathian mite chu thiam chantîr an la nih tûrza a tilang a, chutiang chu Daniela lehkhawba hrilhlâwkna thu inziyahna lâite (*Daniela 7–12*) pawhin an sawi dân a ni bawk.

Amaherawhchu, Daniela chhanchhuah a nih ang hian Pathian chhiahhlawh rinawm dang zawng zawngte pawh hi chhanchhuah an ni ve vek dâwn tihna chu a ni lo tih hria ila. Kristian kohhran chanchin kal tawh kan thlîr kîr chuan mi sâng têt teh meuh martarin an lo thi tawh a, hei hian a châng chuan Pathian hian a chhiahhlawhte chu an rinawmna avânga an tawrh a phal tho a ni tih a tilang. Mahse, Daniela chhanchhuah a ni hi khawvêl tâwpa Pathianin a mite thiam a la chantîr tûrza entîrna a ni tho thung a, tin, sual sipaite chung a thuneitu a nihzia tilangtu pawh a ni bawk. Sakeibaknei rilţâmte lak aţanga Daniela vênghimtu Pathian chuan kumkhua atân sakeibaknei rûm thîn, a ei theih tûr zawnga

phî ruai, kan unaute hêk rengtu Setana hi a tingâwi hlen tawh ang (*1 Pet. 5:8*).

Pathian laka Daniela rinawmzia chu Pathian dân a zawm thatzia aţang pawh hian hmuh theih a ni. Mihringte dân siamin Pathian dân a kalh a nih chuan a khawi zâwk nge zawm zâwk tûr ni ang tihah a buai ve lo. He thupêk hi “Media leh Persia dân danglam ngâi lo” anga pêk a ni a (*Dan. 6:8*). Hetah hian dân pahnih inkalh tak chu a lo lang ta a—ân pahnih hian danglam thei lo niin an insawi ve ve bawk si—chu chuan tâwpna huna ki tê tak tê-in hunte leh dân thlâk danglam a tumna (*Daniela 7*) kawngah kori a tu hle dâwn a ni.

Media leh Persia dân chu tihdanglam theih loh a nih si chuan, Pathian nungchang târ lantu dân hi tihdanglam theih a ni bîk dâwn em ni? Pathian chatuan dân leh mihringte siam chawp dân inbeih tawna hi Daniela thil tawna indona ropui thleng pawimawh êm êm mai a ni a. Sawrkâr lakah rinawm hle mah se, sawrkâr dân siamte chu Pathian dân nêna a inkalh a nih chuan, khawi zâwk nge zawm tûr tih a hre Chiang êm êm a, zawm pawh a tîm bawk hek lo.

Daniela rinawmzia chu Pathian pawhin a rawn hriatpui ve bawk a. Lal Daria khân Daniela hi a ring êm êm a, hrem loha a tâl pût theih dân kawng a zawnpui ngar nghar nghe a nih kha. Mahse, a theih tâk ngang si loh avângin a dân siam hmanga hrem a tûl ta nge nge a; mahse, Daniela Pathian chuan a rawn chhanchhuah a beisei tlat tho. Bible-a kan hmuh dânin pûk kawngkhâr lung chu lal zungbun ngei leh a mi ropuite zungbuna nemin a chhinchhiah a (*Dan. 6:17*).

Hetianga thuah nhihna an chhinchhiah kher chhan chu Daniela chung a thleng tûra a lo rêl tawh chu tihdanglam lovin kal tlang ngei se a tih vâng a ni. Hetiang hian mi thiam pakhat chuan a lo sawi a, a dik hmêl ngawt mai: “Daniela hêktute hian—hetih lâi hian an awm ve ngei ang a, tin, lal mi ropuite pawhin an zungbun hmang ve ngei se titute an nih a rinawm bawk—lalin Daniela

chhanchhuak tûr mi tute emaw a tîrh mai an rin avângin hetiang hian tih an duh ang a, tin, lal pawh hian sakeibakneiten Daniela an seh hlum loh thulha amah hêktuten a nunna lâksak tho an tum a rin avângin hetiang tih hi a duh ve tho bawk a ni ang.” — Leon J. Wood, *A Commentary on Daniela* (Grand Rapids, MI: Zondervan, 1973), p. 169.

Mahse, Daniela thiam chantîr a ni ta hian amah hêktute thiam lohzia a tilang ta si a. Hetiang tih hi hrehawm tak ni mah se, thil tûl tak a ni ve tho bawk a ni. Lalber chuan Daniela hmêlmate chu Daniela an dahna pûkah ngei mai khân paih luh ve tûrin thupêk a chhuak ta a, anni hi chu pûk chhûngah paih luh an nih rual rualin sakeibakneiten an lo pawtsawm nghâl vek mai a ni. Tûn lâi huna kan thlîrna aţang chuan an nupui fanaute paih luh tel ve an ni kher hi pawm a harsa deuh a. Amaherawhchu, lal hian hmân lâi mite tih dân râpthlâk tak chu a zui ve ta mai niin lang.

Hetianga ti tûr hian Pathian chuan thu a pe hran lo va. Pathianin a tih awm chhun chu sakeibakneite lak aţanga Daniela chhanchhua a ni a, chu chuan lal lakah Danielan eng pawh mah a khawih lo tih a lantîr dâwn a ni. Daniela chauh hi Daria hmâa thiam chang awm chhun a ni lo tih kan hre bawk tûr a ni a, amah Pathian ngei pawh Pathian dik leh fel a nihzia tihlanin a awm tel bawk. Lal pawhin Daniela chhanchhuahtu Pathian chu Pathian dik leh nung a nihzia a puang ta hial rêng a: “A ram chu tihchhiat rual a ni lo vang a, awp pawh a tâwp thleng zakin a awm dâwn si a” (*Dan 6:26*) tiin.

THEN 3-NA: NUNA BEL TÛR

“Thalâi duhtakte u, eng mi nge nih in tum? Khawvêla nihna sâng leh hming lam tham nihna ûmin em ni lehkha in zir? Sawi chhuak ngam chiah si lo hian nakin lawkah chuan mi ropui intawhkhâwmnaah ka la t̄thu ve ang tih te emaw, assembly house-ah ram tân dân ka la siam ve ang tih te emaw in ngaihtuah ngâi

em? In tumna chu a sual hran lo ve. Tu pawhin mi hmingthang nih chu in thei thei alâwm. Rilru tenawm tak pua tum lovin, dik taka in hlawhchhuahah chuan lungâwi rawh u. In tum tisâng ula, a hlawhtlin nân hrehawm tuar pawh huam rawh u.—Ellen G. White, *Thalâite Hnêna Thurâwn*, p. 28.

- ❶ **Sawrkâr hnaa eng engte hi nge Kristian nun nêna inrem awm le?**
- ❷ **Sawrkâr laka rinawmna leh Pathian laka rinawmna inkârah hian khawihah nge ramri kan kham ang a, eng tin nge kan kham ang?**
- ❸ **Daniela kha entawn tûr a nih chuan, politics khelh tumte leh sawrkâr hna thawh tumtena an entawn tûr thil pali a tih thinte chu eng nge ni? (*Dan. 6:10, 11 en la*).**

INSIDE STORY

SPANISH NÛ TAWNGTAI NGAINATU

By Rebeca Ruiz Laguardia

HMEICHHE naupang kum 10 mî, Pilar Laguardia-i chuan vân Harsi paw chuâi mai chu a thlîr vang vang a, tihian mahnî a inzâwt a, “*Arsî zawng zawngte hi tû siam nge? Siamtu nei kan ni nge, engtin emaw kan lo awm vê mial mai zâwk le?*” tiin.

Hê zawhna hi kum eng emawti chhûng a lo ngaihtuah tawh thîn a. A chhûngte hnênah pawh an ngaih dânte a lo zâwt tawh bawk thîn a; mahse, a beisei ang chhânna a dawng ngai lo. Sunday nîte chuan biak inah a inkhâwm vê thîn a, mahse a sermon ngaihthlâk pawh chu hremhmun-meî leh, Pathian chu rorêltu nunrâwng leh phuba lâk hmang tak anga an sawi thîn avângin, an chhûngkhaw sâkhaw thurin pawh a pawmpui lutuk lo a ni.

Kum 22 a nih kumin a damlo na hlê mai a, a thi ðelh a ni. Thihna chungchâng a ngaihtuahin, Laguardia-i chu a mangang a, Pathian chungchâng a zawhna a neih chhâna dawng lo vin a'n thi tûr chu a hlâuthâwng hlê ðîn a ni.

Ni khat chu, rilru mangang takin tukverha dâkin, vân lam a thlîr a. “Aw Pathian, ataka awm i nih chuan, Nangmah hriatna neih ka va duh êm! Mìn ðanpui la, ka zawhna min chhâng ang che!” tiin a ðawngtai a.

Chuta ðanga ni thumah, an kawngkâ chu Adventist member pakhat, Simón Montón-an an kawngkâ a rawn kik a ðangin Pathian chhâna a dawng ðan ta a ni. Montón-a chuan Laguardia-i pa, Pathian chungchâng hriatna eng mah kan nei thei lo tih ringtu chu beihpui thlâkna hmuna rawn inkhâwm vê tûrin a sâwm a. Ani chuan hriat vê hrim hrim duhin sâwmna chu a pawm a. Laguardia-i pawh chuan inkhâwm vê a duh a, mahse a pa chuan mahnia kal a duh tih a hrih a. A tâwpah erawh chuan Laguardia-i chu inkhâwm vê a phalsak thei ta hrâm a ni.

Laguardia-i dam kawr chu a la chak lo hlê a, chuti chung chuan Seventh-day Adventist biak inah chuan a vawi khat nân, kum 1960 chho vêl khân a inkhâwm vê ta a ni. An hla sak khûn leh ngaihnawm tak bâkah, *Daniela 2*-a tâwpna hun hrihlâwkna chungchângte chu ngaihnawm ti takin a ngaithlâ a. A pa chu zan khatna bâk a inkhâwm zui ta lo nân, ani erawh chu zan tâwp ber thlengin a inkhâwm zui zêl thung a. Zan hnuhnung berah chuan, thilthlâwnpêkah lehkhabu a dawng a, kohhran member pakhatin a address-te a ziah sak a.

A hnû ni eng emaw zâtah, nu pakhat hian a rawn lên chilh a, Bible zirna neihpuiah a sâwm a. Kâr tina an zir chhoh tâk zêlah chuan, Laguardia-i chuan Pathian chungchâng a zawhna a neihte chhâna chu a dawng chho ta zêl a. A nuna a vawi khat nân thinlunga ngaihmuâng taka awm theihna a nei vê ta a ni.

Pastor Luis Bueno-a chuan Laguardia-i chu Bible zirna an neihpui hnû thla 10 vêlah baptisma a chantîr ta a ni.

Kum 32 mî a nihin pasal a nei a, mahse a taksa lam hrisêl lohna vângin nau pâi lamah harsatna a nei a. Chumi thû-ah pawh chuan a harsatna chu Pathian hnênah a thlen a, tha takin fâ a pâi thei ta a ni.

Ka nu hi kum 73 kal ta khân Spanish berâmpu in tlâwm takah a lo piang a. Tûnah chuan LALPÂ berâm hotu hlim taka hruaitu a ni ta. Pathianin chutiang nu duhawm tak chu min pêk avângin a chungah ka lâwm hlê a ni.

Rebeca Ruiz Laguardia-i hi Spain rama chêng a ni a. A rawngbâwl dân chungchâng hi tûn kuartar Puitling Rawngbâwlna chanchinah chhiar belh tûr a awm.

